

Tico Croes ta duna splicacion di proyecto Starkist

ORANJESTAD(AAN) -- Parlamentario Tico Croes di AVP a reacciona ariba e expresionnan di Boshi Wever encuanto di Starkist.

Segun Croes, Boshi Wever por a bay na e departamentonan cu tabata envolvi y busca informacion pa asina no duna informacion erroneo.

Boshi Wever a prefera pa falsifica e berdad pa crea un impresion croneo cerca pueblo. Tur esaki di mala fe, algo cu ta tipico caba di MEP. Ki ora na pega barco, ki ora nan regala patrimonio di pueblo, nan ta defende nan mes di un forma baho, vil, sushi, cu intimidacionnan pa spanta hende.

Gañamento y sushamento di nomber di hende drechi segun Croes a para bira instrumen-

tonan oficial di e Gobierno actual.

Croes a señala cu Wever por a tuma contacto cu Peter Palmén di AFIA, Tom Barnes di Santa Rosa y Mario Croes e actual vice presidente di e comision di e Mancomunidad Sui-Generis.

Tur e personanan aki segun Croes, hunto cune tabata envolvi di un of otro manera den e proyecto Starkist y e proyecto di acuerdo cu Venezuela ariba tereno di pesca.

Croes a duna un splicacion amplio di e mancho di e Gobierno anterior encuanto e asunto di pesca.

El a bisa cu na '88 miembronan di Gabinete Eman, incluyendo ex Promer Ministro Eman, hunto cu diferente departamento, pa promer biaha den historia, a reuni na diferente ocasion cu e piscadornan local y nan repre-

sentantenan.

A trata diferente topiconan y a cuminsa concretiza diferente palabracionnan haci manera facilidadnan pa cambia paña, acceso liber y permanente pa lamar entre nos hotelnan, a habri e boca na Cura Cabai pa piscadornan por subi lamar grandi mas facil, a cuminsa regla en coordinacion cu APA pa e piscadornan haya un radio y canal propio, a drecha e boeinan ariba lamar, a drecha e luz di Hooiberg y a cuminsa traha ariba un freezer pa warda pesca.

Ademas a cuminsa organiza piscadornan, fomenta contacto entre nan pa intercambia di experiencia y Gobierno lo a cera facilidadnan di trabao di nos piscadornan.

Ademas den e cuadro di proteccion di nos piscadornan a cuminsa cu e proceso pa reglamenta piscamento ariba lamar entre Aruba y Venezuela. Croes a splica cu pa garantiza bo derecho, mester reglamenta asuntonan cu tin di haber cu bo derecho. Ta pesey a cuminsa reglamenta esaki cu Venezuela pa proteha e actividadnan tradicional di pesca di nos piscadornan den awanan Venezolano, pa proteha nos subsuelo marino, pa reglamenta e uso di lamar cu ta sali for di leynan internacional tocante lamar (zeerecht).

Segun Croes, di otro banda, cualkier reglamentacion di uso di awanan rond di Aruba mester

tene cuenta cu articulo 10 di e tratado fronterizo entre Reino y Venezuela, firma dia 31 di Maart '78 na Willemstad, cu ta referi na un tipo di obligacion entre partidonan di e tratado (esta Aruba y Venezuela) pa coordina leynan of reglanan encuanto di piscamento.

Tradicionalmente piscadornan Arubiano a y ta pisca den awanan Venezolano, manera Bajos, Cabo, Cristal y den vecindario di Los Monjes. Di otro banda, piscadornan Venezolano tambe sa pisca den awanan Arubano.

Experiencia di piscamento entre Trinidad y Venezuela y Guyana - Venezuela ta muestra cu caminda falta acuerdo entre paisnan bisña, esaki por resulta den conflictonan serio.

Especialmente pa piscadornan mes.

Segun Croes, den caso di nos piscadornan, tin experiencia cu

mas y mas nos piscadornan tabata worde molestia pa guarda costa Venezolano, strobando di e forma aki di eherce nan trabao y un derecho tradicional di pisca den awanan Venezolano.

E derecho aki ta worde reconoci den derecho di lamar (zeerecht) moderno.

Croes a sigui bisa cu esaki sin embargo mester worde regla den un acuerdo bilateral entre e dos paisnan concerni. E concepto di acuerdo adunto ta reflesha e principionan di derecho di lamar moderno y e principio di reciprocidad acepta internacionalmente.

Croes a enfatisa cu contrario na loke Boshi Wever ta bisa, articulo 4 di e concepto di e acuerdo aki ta stipula cu cualkier permiso otorga na barconan Venezolano pa pisca den awanan di Aruba mester atene nan mes na nos exigencianan y condicionnan.